



MEMOIRE

POVR M^e *Iean Baptiste de Contes* Conseiller du Roy en ses Conseils, Doyen de l'Eglise de Paris, ancien Docteur du Decret; & M^e *Pierre Loysel* Chancelier de l'Vniuersité de Paris, executeurs perpetuels des Testament & Codicilles de feu M^e *Iean Dartis* Docteur Regent & Doyen de la Faculté du droit Canon aux Escoles dudit Decret, seul Lecteur & Professeur du Roy en ladite Faculté au College Royal: & Dom *Iean Harel* Superieur General des Peres Benedictins de la Congregation de S. Maur, heritiers instituez dudit feu sieur Dartis, demandeurs en Requête.

Contre M^e Philippes de Buifine seul Docteur Regent en Droit Canon aux Escoles dudit Decret, Defendeur.



MAISTRE Iean Dartis, porté d'un zele extraordinaire pour le reestablissement de la Faculté de Droit Canon en l'Vniuersité de Paris, où elle estoit tout à fait deschiée de son ancienne splendeur; par son *Codicille du 7. Avril 1651.* en confirmant un Legs de Vingt Mille liures qu'il auoit fait par son Testament precedent à la Faculté du Decret, & au profit des Docteurs Regents en Droit Canon, lisants actuellement en l'Escole dudit Decret, & non Mariez: nomma M^e Iean Doujat, Docteur es Droits & Aduocat en Parlement, quoy qu'absent, & par la seule connoissance qu'il auoit de sa capacité, & de sa probité; comme vne personne qu'il jugeoit très propre à remplir vne des Chaire vacantes en ladite Escole, & pria les Demandeurs de le recommander & assister en ce dessein, que ledit Dartis luy auoit inspiré: & en suite ayant fait reuenir ledit Doujat de Bourges, où il estoit allé disputer vne des Chaires de Droit Canon & Ciuil vacantes en lad. Vniuersité; il luy fit expedier vn *Acte de Postulation*, ou Nomination en forme, par lequel la Faculté supplie Nosseigneurs de Parlement, d'Etablir ledit Doujat en la Chaire vacante par la mort de feu M^e François Florent. Cét Acte en date du 15. *Avril 1651.* est signé dudit sieur Dartis & du Bedeau de la Faculté: M^e Philippes de Buifine, qui auoit témoigné audit sieur Dartis agréer cette Postulation; différa, & enfin refusa d'en signer l'Acte, à dessein de s'emparer des archifs, & de tout le logement

desdites Escoles, & de jouir de tous les émoluments, & de toutes les recompenses de ladite Faculté; d'y adjouster les gages ou pension de douze cens liures sur les cinq grosses, fermes dont jouissoit ledit defunct sieur Florent; comme il a fait: & d'y joindre, mesme s'il eust pû, les gages, mais non pas les fonctions, de la Chaire de Professeur du Roy en Droit Canon, au College Royal, dont estoit pourueu ledit sieur Dartis: qui sont les mesmes fins qui luy auoient fait differer de publier, & de faire disputer les Chaires vacantes depuis six à sept mois, en lad. Faculté, par le decès dudit Florent, & de M^e Gabriel Bourillier; à quoy il ne voulut iamais entendre, quelque instance que ledit sieur Dartis luy en eust fait durant les interualles de santé, qu'il eust après la mort de leursdits Colleges.

Les Demandeurs ont présenté Requête à la Cour en execution de la volonté du defunct: ledit sieur de Buifine s'y est opposé. Mais sans aucun autre fondement, que le desir de jouir de tous les susdits auantages.

La Requête des Demandeurs est fondée sur deux principaux Titres: sçauoir la dernière Volonté, & Disposition Testamentaire dudit defunct sieur Dartis en qualité de Bien-facteur, & à vray dire second Fondateur de ladite Faculté & Escole du Decret, au moyen d'une liberalité si notable: & la Postulation faite par le mesme defunct sieur Dartis, en qualité de Doyen de ladite Faculté & College du Decret.

Pour le Premier, il est certain que comme la Sepulture des Morts à fait partie de la religion: aussi la dernière Disposition des Mourants a tousiours esté considérée comme vne chose sacrée: & c'est sans doute pour cette raison que les Romains mettoient ordinairement leurs Testaments en deposit dans les Temples. Comme que c'en soit les Iuriscultes demeurent d'accord qu'à l'égard des heritiers, des legataires, & de tous ceux qui reçoient quelque gratification d'un Testateur, sa volonté doit estre inuiolablement obseruée en ce qu'il exige d'eux, & tous ses ordres doiuent estre executez sans difficulté, comme autant de loix, ainsi que les appelle l'Empereur Iustinian. *Nov. 22. cap. 2.* à moins qu'ils soient impossibles, ou d'une impossibilité naturelle, ou du moins d'une impossibilité morale: *debent, si non ad turpem causam feruntur, ad effectum perduc.* comme parle le Iurisculte Pomponius en la *L. 2. Mucius 7. in f. ff. de ann. legat.* à quoy se rapportent, non seulement la pensée de Constantin en cette belle Loy. *1. Cod. de sacros. Eccles.* mais aussi celle des Papes S. Gregoire, & Gelase, *can. vltima xiii. q. 2. & can. consideratio xvi. q. 1.* Et cette obligation a lieu aussi bien à l'égard des Corps & Communantez gratifiées par un testateur, que des particuliers, comme il se void en la *l. liberto. 21. §. Lucius Titius 3. ff. de ann. legat.* en la *l. Septicia. 10. ff. de pollicitation.*

De là est venuë parmy les Chrestiens la permission aux Ecclesiastiques, qui donnoient quelque chose du leur à l'Eglise, d'affranchir quelques-uns de ses esclaves, *cap. consensus 3. de reb. eccles. alienan.* De là l'usage des Precaires dans l'Eglise d'Occident, *can. Precaria, ix. q. 2.* De là l'obligation d'assister dans leur incommodité, les fideles, qui dans leur abondance auoient fait part de leurs biens à l'Eglise, & tous les autres droits de Patronat, dont il est parlé au *can. quicumque fidelium, & seqq. xvi. q. 7. & to. tit. de jure patron.* Entre ces droits, chacun sçait que la Nomination ou Presentation des Ministres Ecclesia-

stiques pour deservir dans les Eglises, Chappelles, & autres tels lieux de pieté, tient vn des principaux rangs. Ce droict se trouue en mesme temps estably, & par les loix Civiles, & par les saints Decrets : & son establissement semble auoir esté introduit en l'Eglise Latine, par le Canon 10. du 1. Concile d'Orange, que Gratian attribué par mégarde au Pape Nicolas *can. 1. xvi. q. 5.* & en Orient par la *Nou. 113. de Iustinian chap. 18.* Il a esté depuis confirmé par quantité de Conciles, conformément ausquels le Pape Alexandre III. *cap. significasti 18. de iure patron.* escrit absolument, & sans aucune reserve, *que personæ idoneæ, quas ad Ecclesias vacantes presentauerint (fundatores), sunt admittendæ.*

Cela estant, on ne peut douter que le defunt sieur Dartis, faisant vne liberalité de Vint Mille liures à la Faculté du Decret, pour reestabli ses reuenus dissipez, liberalité, qui avec raison peut passer pour vne seconde fondation; n'ait esté en droit de nommer du moins vne personne capable, pour tenir vne place dans ce College. Car que peut-on alleguer de considerable contre sa disposition?

Dira t'on que ce Droit de Nomination n'appartient qu'aux premiers Fondateurs, ou à leurs successeurs? Les Canons decident neantmoins, vnamiment que la Dotation est preferable à la Construction du bastiment, qui seroit inutile sans l'Establissement d'vn reuenue certain pour l'entretien & du bastiment, & des personnes destinées pour y faire les fonctions necessaires: *Cum corporalis Ecclesia, aut Episcopus, aut abbas, aut tale aliquid, sine rebus corporalibus in nullo proficiat: sicut nec anima sine corpore corporaliter viuit.* Comme dit le Pape Paschal au *Can. si quis obiecerit 1. q. 3.* C'est pourquoy les Loix Politiques & Ecclesiastiques ne font aucune distinction, pour les Priuileges deus aux Patrons, entre le premier fondateur, & celui qui donne dequoy entretenir la fondation. *Siquis edificans Ecclesiam, aut etiam aliter expendens in ea ministrantibus alimenta,* dit Iustin. en sa *Nou. 57. chap. 2.* les Euesques du 9. Concile de Toledé confondent ces deux sortes de bienfauteurs, donnant les mesmes droicts *propinquis eius qui construxit, vel ditauit Ecclesiam. Can. filiis xvi. quest. 7.* Et pour ce suier le susdit Empeereur en sa *Nou. 67. chap. 2.* ne fait point difficulté de donner au Restaurateur, le titre de *fabricator Ecclesiæ* ou pour mieux dire de Createur, *κτίστης*, comme porte l'original. Aussi Innocent 4. & le Cardinal Hostiensis sur la rubrique *de iure patron.* & Ioan. Andr. sur la glos. 1. du chap. 1. tiennent, que, *si à principio sine dote fuisset fundata & consecrata Ecclesia, qui postea illam dotaret, patronus esset.* Enfin ces droicts ont lieu toutes les fois que quelqu'un des fideles, *de facultatibus suis Ecclesia aliquid contulerit, d. can. quicumque xvi. q. 7.* cela s'entend pouruen que ce soit vne liberalité considerable, & qui aproche dela fondation, ou du reestablissement. En tout cas quand on voudroit demeurer d'accord que le titre de Patron n'appartiédroit pas à la rigueur, & à proprement parler, à celui qui donne dequoy reestabli vne Eglise ruinée, ou dequoy entretenir sa fondation, on ne scauroit nier qu'il n'en deust auoir la pluspart des auantages, par tous les passages alleguez cy dessus: & encore par la raison, qui nous fait voir que la conseruation n'estant pas moins necessaire pour la subsistence d'vne chose, que sa premiere creation; il n'est pas moins auanta-

geux de remettre ce qui est destruit, que d'establiſſir ce qui n'eſtoit pas encore.

Dira-t'on que ce que deſſus n'a lieu qu'en la fondation & dotation des Eglises? toutes les conſtitutions ſacrées & Ciuiles refuteront cette allegation, puis qu'elles comparent touſiours aux Eglises, meſmes en ce point, toutes les Communautéz & maiſons eccléſiaſtiques & Publiques: *Religioſas domus, & venerabilia loca, atque huiusmodi conſortia*, comme il ſe void par la *l. ſancimus 46. Cod. de Epiſc. & Cler. l. ſancimus 22. de ſacroſanct. Eccl. Nou. 131. cap. 10. & to. tit. de Relig. donib.*

Voudra-t-on dire que ledit ſieur Dartis n'a pas exprimé que ce fuſt ſon intention qu'une des Chaires vacantes fut donnée audit Doujat ſans diſpute? ſ'il n'auoit ſat connoiſtre ſa volonté que par les termes de ſon Codicille, on pourroit touſiours répondre, que ſi cette intention n'y eſt pas expliquée directement, & *verbis imperatiuis*, elle l'eſt du moins *verbis precariis*, & comme par forme de fideiſcommis, qui par la conſtitution de Juſtinian n'a pas moins de force qu'un legs, *ſ. ſed non uſque 3. Inſt. de legat. l. 2. Cod. commun. de lega.* Mais ſon deſir ayant eſté depuis nettement déclaré par un Acte de Poſtularion, laquelle pour toute formalité ne requiert que l'approbation du Supérieur; Acte qui du moins tient lieu d'un nouveau Codicille, & qui monſtre une forte & conſtante reſolution; il ne reſte plus aucun pretexte de doute, qu'à ceux qui en cherchent quelque un de chicaner la volonté du bien-facteur, laquelle ne ſçauroit eſtre plus expreſſe: de ſorte qu'il n'y a autre choſe à faire qu'à l'accomplir, *ſpe-ctanda, ſeruandaque teſtatoris voluntas. l. fideiſcommiſſa. 11. ſ. item ſi quis. 1. ff. de lega. 3.* Enfin il eſt à conſiderer qu'il ne s'agit pas icy d'un plein droit de patronat, tranſmiſſible aux heritiers à perpetuité, mais de la Nomination pour une ſeule fois, d'une perſonne capable, à une de trois, ou de cinq places vacantes dans la Faculté.

La ſeule choſe qu'on pourroit alleguer, ſeroit peut-eſtre qu'il faut examiner ſi la perſonne nommée eſt capable de l'employ à quoy le teſtateur l'a deſtinée. Cela ſeroit bon à dire ſi le teſmoignage dudit deſunt ſieur Dartis n'eſtoit irréprochable, tant à cauſe de ſa ſuffiſance, connue par ſes ouurages; que de ſon zèle pour la Faculté, au bien de laquelle on voit qu'il a ſongé par ſa dernière diſpoſition, & non à l'aduantage dudit Doujat; qui ne luy eſtoit ny parent, ny amy, & qui en cetemps-là eſtoit meſme abſent de Paris. De plus un ſuffrage ſi authentique ſe trouue encore confirmé par celui de tous les Docteurs Regens de l'Vniuerſité de Bourges, qui par deux Certificats des 2. May 1651. & 16. Decembre 1652. déclarent avec eloge la bonne opinion qu'ils ont de la perſonne dudit Doujat, par les eſpreuues qu'il fit en meſme temps en leurs Ecoles pour la diſpute des Chaires de droit. Enfin les mœurs & le ſçauoir dudit Doujat ſont aſſez connus par la reputation qu'il a acquiſe parmi les gens de Lettres, & par les preuues qu'il a données de ſa ſuffiſance en droit Canon dans les Leçons qu'il a faites & qu'il fait touſiours avec aſſiduité au Colege Royal.

Ces raiſons ſuffiſent ſans doute pour eſtabliſſir le droit dudit Doujat par la Dernière Diſpoſition du deſunt ſieur Dartis, conſideré en qualité de Bienfacteur de la Faculté ſeulement, & quand il n'eût eu de ſoy aucun droit de ſuffrage: Mais ſi à ce premier titre on adioute celui de la Poſtulation par luy faite en qualité de

Doyen de ladite Faculté, dont il faisoit la meilleure & la plus saine partie, quelle difficulté peut-il rester, qui en retarde l'exécution, s'il plaist à la Cour de l'agréer ?

Pour paruenir aux Chaires de Docteurs Regents, de mesme qu'aux benefices & dignitez Ecclesiastiques, il y a trois voyes, sçauoir l'*Election* qui se fait d'un entre plusieurs contendants, la *Translation* ou Euocation d'une Eglise ou d'une Vniuersité à l'autre, & la simple *Postulation* d'un homme qui sans entrer en concours, & sans auoir exercé vne charge ailleurs, en est toutefois estimé capable par le bruit commun, & la reputation qu'il a d'homme de sçauoir, & de bonnes mœurs. La premiere sorte de prouision est plus ordinaire, & receüe dans le commun vsage : les deux dernieres dependent de la grace du superieur, qui dispense de la rigueur des formes ordinaires, & leue les empeschemens qui se rencontrent en la personne, soit à cause du lien qui l'attache à vne autre Eglise, soit à cause de quelque defect de naissance, d'âge, d'ordre, ou autre qui empesche l'*Election* (tel qu'est icy le defect de la dispute). Ces trois voyes sont toutesfois également Canoniques dans le sentiment de *Panorme* i. rubri. de *Postul. pralator*, & de tous les Canonistes. Et il est si vray que la *Postulation* n'est pas moins fauorable que l'*Election*, & que la *Translation*; que bien souuent ces noms sont confondus dans les Canons, qui prennent le mot postuler pour elire, comme au *can. literas 14. dist. 63. can. obitum 16. dist. 61.* & de mesme le mot de *Postulation* pour celuy de *Translation*, *tototit. è. de postul. pralat.*

Ce n'est pas vne chose nouuelle, non plus dans les Vniuersitez que dans l'Eglise, que l'vsage des *Postulations*, aussi bien depuis l'ordonnance de Blois que deuant. M. Guillaume de Maran Docteur Regent en l'Vniuersité de Toulouse, marque les trois voyes susdites comme legitimes pour paruenir aux Chaires de l'un & de l'autre Droit, dans l'Epistre dedicatoire d'un de ses traittez de la iustice qu'il adresse aux Capitouls de laditte Ville. Dans le sac des Demandeurs il y a deux *Certificats*, ou Actes en forme de notoriété, qui confirment cette verité, l'un de laditte Vniuersité de Toulouse en date du 13. *Auail 1652.* l'autre de celle de Bourges en date de l'11. *Decembre audit an*, qui sont sans contredit les deux plus celebres Vniuersitez du Royaume, & mesme del'Europe, pour le droit. Les exemples en sont recents dans toutes deux : à Toulouse en la personne de feu M. Martin de Poulhier nommé par *Postulation* à la pluralité des voix en l'an 1632. & de M. Antoine d'Auteferre nommé de mesme l'an 1648. dont la nomination fut confirmée sans difficulté par Arrest du Parlement de Toulouse, le 20. *Octobre audit an.* En l'Vniuersité de Bourges feu M. Marc Antoine Dominici, fut appellé par semblable voye, qui fut confirmée par Arrest de la Cour du *Decembre 1648.* La Faculté mesme du *Decret* Postula feu M. François Florent, ce qui fut approuué par Arrest de la Cour le 5. *Mars 1644.*

Et si la *Postulation* est admise lors qu'il n'y a qu'une Chaire vacante, à plus forte raison y a-t-il lieu d'y recourir lors qu'il n'y a qu'une Chaire remplie, & que cet acte est fait par un Bien-facteur.

La grande Defense dudit sieur de Buisine contre la *Postulation* dudit Doujat est l'art. 86. del'Ordonnance de Blois, qui veut que dans le mois de la vacance

de chaque Chaire de droit Canon & Civil, elle soit publiée, mise au concours, & enfin donnée à celui qui *par leçons continuées un mois durant & par répétitions publiques*, aura esté trouué le plus digne: à quoy il adiouste les termes des statuts de l'Vniuersité de Paris de la dernière reformation de l'an 1598. au Chapitre qui concerne la faculté du Decret, article 10. qui veut la mesme chose. Mais ces articles de l'ordonnance & des statuts ne sont pas moins contraires à la Postulation que ledit sieur de Buissine vouloit faire, comme il dit dans son Factum contre les Demandeurs, tantost de la personne de M. Iean d'Auezan Docteur Regent & maintenant Doyen de l'Vniuersité d'Orleans, tantost de M. Charles Annibal Fabrot Doyen de l'Vniuersité d'Aix; puis qu'enfin il ne pretendoit pas appeller ces deux Docteurs aux chaires du Decret par dispute, ou plustost il ne pretendoit les y appeller qu'en apparence, sçachant bien qu'ils ne pouuoient accepter cet employ, à cause de leur âge, & de leurs autres emplois & engagements, beaucoup plus commodes, & plus auantageux en toute façon. Les susdits obstacles ne s'opposoient pas moins à la Postulation de feu M. François Florent, à la quelle ledit sieur de Buissine donna son consentement il y a dix ans; il est vray qu'il le donna parce qu'il n'estoit pas seul, & ne pouuoit alors pretendre de tirer du refus qu'il en eust fait, les auantages qu'il a tirez des empeschemens qu'il a mis à la Postulation dudit Doujat. Il est pourtant certain que ledit feu sieur Florent n'a iamais disputé aucune Chaire; celle qu'il auoit à Orleans luy ayant esté adiugée sans dispute par Arrest de la Cour: de sorte qu'il faut que ledit sieur de Buissine auoué ou que la Postulation en soy n'est pas contraire à l'ordonnance, comme il sera monstré cy après, ou qu'il a contreuenue luy mesme à l'ordonnance; & que la Cour mesme a passé par dessus par sondit Arrest du cinquiesme Mars 644. & autres cy-dessus mentionnez, confirmatifs de diuerses Postulations.

De dire que ledit sieur Florent estoit déjà Docteur Regent en l'Vniuersité d'Orleans, ce n'est pas monstrier la necessité de la dispute pour obtenir vne Chaire dans l'Eschole du Decret: c'est reconnoistre au contraire qu'on y peut venir legitiment par autre voye que par celle de l'Electio. D'exiger pour la Postulation, que celui qui est Postulé, soit déjà reuestu d'une pareille charge ou dignité, que celle à laquelle on le veut Postuler, outre que la charge de Professeur du Roy, (dont est reuestu ledit Doujat depuis trois ans, & qu'il exerce avec soin, & assiduité) equipolle sans doute à celle de Docteur Regent en la mesme faculté ou science: c'est confondre la Postulation avec la Translation, contre les Principes du droit Canon: Et le contraire se void nettement au chapitre *innotuit 20. de Election*, où la Postulation d'un Archidiaque d'York à l'Euesché de Worcester en Angleterre, est confirmée par le Pape Innocent III. & au Chapitre *cum Monasterium 13. eod. t.* où un homme qui n'estoit point profès ayant esté Postulé Abbé, Celestin III. approuue la Postulation sans difficulté: & le mesme a esté pratiqué pour les charges de Docteur Regent, en faueur du sieur Dominicy, & autres, dont il a esté parlé cy-dessus, qui pour cela n'ont pas fait moins d'honneur à leurs Facultez que ceux qui y estoient entrez par Dispute.

Au reste on peut soustenir avec beaucoup de raison, que par le refus que ledit sieur de Buissine auoit fait de concourir avec ledit feu sieur Dartis son

Doyen, à chercher les voyes de remplir les Chaires desdits defuncts sieurs Florent & Boutillier leurs Collegues, ou du moins par la negligence de les faire publier dans le mois de leur vacance ; le droit de suffrage qui luy pouuoit appartenir, estoit deuolu audit sieur Dartis, qui, soit durant son indisposition, soit durant les interualles qu'il auoit de santé, faisoit tout ce qui luy estoit possible pour remplir lesdites Chaires. Cette Doctrine est constante par le texte du chap. *Ne pro defectu* 41. de *Elect. iunctâ glos. in cap. gratum. verbo pauciores. de postul.* & par toutes les autoritez alleguées par ledit sieur de Buifine en sondit Factum, pour faire valoir en sa personne tous les droits de sa Faculté après la mort de ses Collegues : quoy que tous ces passages ne parlent pas de la reduction par mort d'un College à vne seule personne, mais du droit deuolu au plus petit nombre, & mesme à vn seul Collegue, par l'indignité du plus grand nombre, qui est le cas proposé.

Et veritablement il y a de quoy s'estonner, que ledit sieur de Buifine, ayant soustenu durant trois ans qu'il pouuoit luy seul par son suffrage distribuer les trois, ou cinq Chaires vacantes de la Faculté du Decret ; ait tousiours opiniastrement denié vn pareil pouuoir à l'égard d'une desdites Chaires, à son Doyen, qui avec cela est Bien-facteur de sa Faculté, laquelle n'a quasi point d'autre reuenue certain & fixe, que les mille liures de rente que ledit sieur Dartis luy a laissées.

Que si les exceptions ne destruisent pas vne regle, mais la confirment : & si les Priuileges ne sont iamais censez deroger à la loy, la Postulation est encore moins contraire à la loy ordinaire des Elections : d'autant que le Priuilege émane d'une grace speciale du Prince en faueur d'une seule personne, ou d'un petit nombre ; & la Postulation, quoy que fondée sur la grace du Superieur, qui dispense de la rigueur des formes, est neantmoins establie par vn droit commun, qui n'est point attaché à certaines personnes, & par ce moyen cette voye n'est pas moins Canonique que l'Electiō mesme.

Aussi est-il vray que les Ordonnances, Statuts, & Reglemens, n'ordonnant la dispute & le concours, que pour auoir certitude de la capacité de celuy qu'on doit élire ; on suit leur esprit, toutes les fois qu'on a cette certitude par quelque moyen que ce soit ; & pourueu que l'on soit asseuré de la capacité d'une personne, il importe peu au public de quelle façon on s'en assure. *Ecclesiastica prohibitiones* (il en est de mesme de toutes constitutions) *propriis habent causas, quibus cessantibus cessant & ipsa*, dit Gratian. *§. his omnibus, post can. statuimus* 8. *§. sed sciendum. dist. 61.* Et chacun void que ledit sieur de Buifine n'affecte la voye de la dispute qu'à cause de sa longueur : estant mis en fait que si l'on fait disputer seulement trois Chaires l'une apres l'autre, suivant sa pretention, elles ne scauroient estre remplies de dix-huit mois ; & quand on les fera disputer toutes ensemble, il faut six mois de temps, soit pour la publication, soit pour les lectures, & pour les repetitions ou disputes des contendants ; sans parler de la difficulté qui se rencontrera au deffray des Docteurs Regens de dehors, qu'il ne consent d'auoir pour adjoins, que parce que sa Faculté n'a point de reuenue qu'on puisse destiner à cet usage, ainsi qu'il proteste dans son Factum.

Certainement, si on considere les choses de près, on trouuera que pour l'ordi-

naire les Chaires sont pour le moins aussi bien remplies par la voye de la Postulation, que par celle de l'Electiō : parce que par la Postulation on choisit des hommes de capacité & de probité connuë, & des gens tout faits, sans s'adstreindre au nombre de ceux qui se presentent, avec lesquels des personnes de grand merite font difficulté de se commettre, & de hazarder vne longue reputation, à cause des diuers accidents qui en semblable rencontre peuuent arriuer aux plus habiles. L'exemple de Monsieur Cuias qui fut postposé à Forcatel dans l'Vniuersité de Toulouse, ainsi qu'il est remarqué en sa vie, fait assés voir que ce n'est pas tousiours la voye la plus seure de choisir des Docteurs Regens, que la dispute : à laquelle aussi pour cette raison le grand Scaliger ne se voulut iamais soumettre.

De vouloir obliger ledit Doujat à cette esprouue, le reduisant à la condition du moindre gradué, & du plus inconnu de ceux qui s'y voudront presenter, ce seroit vouloir rendre inutile non seulement sa qualité de Professeur du Roy, mais la Nomination de sa personne faite par ledit sieur Dartis en sa dernière disposition, & confirmée par l'acte de Postulation ; & ce seroit ne considerer ny la volonté d'un Bienfacteur & comme second fondateur de la Faculté, ny le suffrage d'un Doyen qui du moins faisoit la meilleure partie du College.

Et il y a d'autant plus de raison de l'exempter de la rigueur de cette dispute, si ledit sieur de Buisine y a la principale voix, que non seulement ledit sieur de Buisine luy a fait un procès de gayeté de cœur ; mais s'est déclaré ouuertement son ennemy en diuerses rencontres publiques & particulieres, ayant plusieurs fois declamé iniurieusement, & avec menaces contre luy dans l'Escole du Decret, au lieu d'expliquer sa leçon aux Escoliers, auxquels il defendit mesme le 16. Iuin dernier, d'aller prendre celles dudit Doujat, avec protestation que s'ils y alloient il leur refuseroit les Degrez, les Certificats d'estude, la participation du legs dudit feu sieur Dartis, & tous les auantages de sa Faculté. Si l'on demande la cause de cette inimitié, on n'en scauroit alleguer d'autre, si ce n'est que ledit Doujat n'a pas esté en disposition de luy quitter sa Chaire de Professeur du Roy, dont il a esté pourueu par la demission dudit feu sieur Dartis, de la mesme façon qu'il auoient esté ledit sieur Dartis, & le sieur Guijon, scauoir par lettres de sa Majesté signées en queue par le sieur grand Aumosnier de France.

Enfin l'Ordonnance exigeant principalement en l'Electiō la lecture d'un mois, si celles que ledit Doujat a faites depuis trois ans au College Royal, ne semblent pas suffisantes, il sera tousiours prest d'en faire vne nonuelle sur telle matiere, soit du Decret, soit des Decretales, qu'il plaira à la Cour de luy ordonner : Et les Demandeurs ne doutent pas qu'il ne s'en acquite dignement, & au contentement des Iuges qui seront nommez par la Cour, autres que ledit sieur de Buisine, qui ne peut estre son Iuge, pour les raisons cy-dessus, & autres qu'on y pourra adjoûster.

Mais ledit sieur de Buisine a d'autant moins de raison d'alleguer l'Ordonnance de Blois, qu'il y a luy-mesme manifestement contreuenue, n'ayant pas traouillé, comme il deuoit par les termes d'icelle, à remplir dans le mois lesdites Chaires vacantes, ainsi qu'il a esté remarqué, *Frustra legis auxilium inuocat, qui in legem quam innocat, committit.*